



Kamis, 24 Pebruari 2022

Ogen: Masmur 119:9-16



Kusur-Kusur I Bas Pusuh



Dekahen engkusurken nakan asangken engkusurken ukur nina rusur pedah-pedah nande si enggo metua man anakna singuda-nguda. Enda biasana i bas anak e ndarami teman nggeluh, i ja lit dua kalak dilaki si rate ngena man bana. Latih akapna mutuskensa si apai atena jadi teman geluhna. E maka ipindona pandangan arah nande si enggo leben nenganami bagi si inanamina e. Je lalap ukurna, ikusur-kusurna bas pusuhna si apai nge si mbagesna keleng atena. Muatna tayang pe lalap jadi tangkelenna. .

Pengalaman singuda-nguda e mejile adi jadi pengalamenta i bas engkusur-kusur Kata Dibata i bas pusuh. Ertina lalap si ukuri Kata Dibata e i ja pe ras kai pe silakoken. La lit waktunta sirang ras Kata Dibata e. Bagi syair lagu si ikutip arah kitab Masmur enda nina, *ku renungkan FirmanMu siang dan malam, ku pegang perintahMu dan kulakukan*. Bage min pengakunta nandangi Kata Dibata e. I kusur-kusur i bas pusuh seri e ras irenungken kenca e idalanken. La kepe bias terjeng irenungken ngenca.

Pengalaman sekalak Moria bas nekolahken anakna si ersura-sura bengket ku TNI. Daramina dalam uga maka banci anak enda tampil, ileskenna secara husus, iasramakenna 4 bulan dekahna, i je anak e ibina, iajari ras icukupi gizina. Tupung test sangana ilakoken, lit si njumpai Moria e, asakai berekenndu 'lapikna' (uang sogok) maka banci anakndu e pagi lulus. Nina Moria e, la lit ku bereken seakatan sen si iperluken tupung ia i asrama. Adi la lit lapikna labo banci lulus anakndu e nina si ngera ndai. Iinget Moria e Kata Dibata si lit i bas pusuhna, 'ula nogok,' e lalap jadi ukurenna, ikusur-kusurna bas pusuhna, dungna iputuskenna la nogok. Tuhu la lulus anak e tapi bas pusuhna, banci nge dahin si deban idahiken anakku e tapi aku ras anakku e enggo ndalanken kata Dibata.